

Nunat Avannarliit Killiit Siunnersuisoqatigiiffiata aalajangersagaa nr. 2/2008 Inatsisartunit taperserseqarnissaa pillugu Inatsisartut aalajangiiffigisassaattut siunnersuut, aalajangersagaq ima oqaasertaqarpoq:

**Savalimmiut Islandilu illuatungimik nunaanni naalagaaffiit aallartitaqarfiattut qaffasissuseqartunik aallartitaqarfinnik pilersitsinikuupput. Nunat illuatungimik nunaanni naalagaaffiit aallartitaqarfiattut qaffasissuseqartumik pisortatigoortumik aallartitaqarfimmik pilersitsinissamik isumaqatigiissuteqarnissaat Nunat Avannarliit Killiit Siunnersuisoqatigiiffiata Kalaallit Nunaanni aammalu Islandimi naalakkersuisunut kaammattuutigaa. Taamatullu illuatungimik nunaanni sinniisoqarfittut allaffeqarfinnik pilersitseqqullugit Savalimmiuni Kalaallilu Nunaanni naalakkersuisut Nunat Avannarliit Killiit Siunnersuisoqatigiiffiannit kaammartorneqarput. Taakku pilersinneqarnissaanni ataatsimoorussamik allaffiit sapinngisamik annertunerpaamik atorneqartarnissaat nunanut kaammattuutigineqarpoq.**

(Josef Motzfeldt, aallartitat siulittaasuat)

### **Akissuteqaat**

(Naalakkersuisut Siulittaasuat)

### **Siullermeerneqarnera**

Inatsisartut Nunani Avannarlerni Killerni Siunnersuisoqatigiinni Siulittaasuata inassutigaa, Nunani Avannarlerni Killerni sinniisuutitaqarnissamik kajumilersitsiniarluni isumaqatigiissut 2/2008 ilannguffigineqassasoq.

Aallaqqaasiullugu eqqaasitsissutigilara, ukiuni siuliini Inatsisartut ullormut oqaluuserisassaanni oqaluuserineqartoq ilaasarsimavoq, ilaatigut Nunani Avannarlerni Killerni Siunnersuisoqatigiit kajumilersitsiniarluni isumaqatigiissutaat nr. 2/2006 aallaavigalugu.

Naalakkersuisut suli isumaqarput, namminerisamik nunani allani sinniisoqarneq tassaasoq Kalaallit Nunaata nunani allani attaveqaataasa naliginnaasumik unammilligassaasa ilagigaat.

Naalakkersuisut ilisimalluarpaat nunani allani sinniisoqarfeqarneq arlalinnik atuuffeqartoq, tassunga ilanngullugit siunnersuummi eqqaaneqartut, ”inooqatigiinnikkut kulturikkullu qilerutit nukittorsarnissaannut iluaqutaasinnaasut”.

Kalaallit Nunaata ukiuni arlalialunni nunani allani sinniisoqarfimmik pilersitsinissamut atatillugu sukumiisumik naliliinissaq politikkerivaat, ilumut sinniisuutitaqarnissamik pisariaqartitsisoqavinnersoq politikkikkut aamma/imaluunniit niuernikkut aningaasanik isertitaqarnissamik tunngavissaqartoqarnersoq. Tamanna ilaatigut peqquteqarpoq nunani allani sinniisoqarfimmik pilersitsineq ingerlatsinerlu akisummata.

Savalimmiunut Islandimullu tunngatillugu Naalakkersuisuusut kangimut sanilitsinnik suleqateqarneq nukittorsarneqarnissaanut anguniagaqarput. Naalakkersuinikkut islandimiunik ukiumoortumik nunanut allanut ministerimik ataatsimeeqateqartarnerit aallartissimapput. Savalimmiormiunik naalakkersuinikkut oqaloqateqarnerit qanimut ingerlanneqartuupput.

Peqqinnissaqarfiup iluani Islandimut suleqatigiinnissamik isumaqatigiissusiortoqarsimavoq. Suleqatigiinnissamik isumaqatigiissutip nunatta Islandillu akornanni peqqinnissqarnermi suleqatigiinneq sulisussanik pissarsiornermi, ilinniartitaanermi katsorsaanermilu nukittorsarpaa.

Naalakkersuisut ullumikkut inerniliinerat tassaavoq, Savalimmiut Kalaallit Nunaatalu suleqatigiinnerat nukittorsassallugu, kisianni suliassaqarfimmut tassunga tunngatillugu nunanik allanik suleqateqarnerup annertusarnissaanut tunngasumik apeqqut qaqinneqarumaarpoq sukumiisumik nunanut allanut sulianut siumut isigisumik iliuusissami. Taanna Inatsisartut upernaakkut ataatsimiinneranni saqqummiunneqarumaarpoq nunanut allanut tunngasutigut naalakkersuinikkut ingerlatsineq pillugu nassuiaammi. Ukiuni makkunani Naalakkersuisut allafissornikkut ingerlatsinermi sipaarniuteqarput, taamaattorli apeqqut nunani allani aallartitaqarfinnut tunngasoq qaqeqqinneqarumaarpoq aningaasaqarniarnikkut atugarisat pitsaanerulerpata. Taamaammat Naalakkersuisut innersuussutigaat aalajangiiffigisassatut siunnersuut itigartinneqassasoq.